

條

麓

堂

集

條麓堂集卷之二十六

誌一

封特進光祿大夫左柱國少師兼太子太師吏部

尚書中樞殿大學士觀瀾張公墓誌銘

封特進觀瀾張公者今少師江陵端公之父也端公以  
耳盤舊德受知穆考親承憑玉末命輔今上于冲年畢  
智殫誠孜孜夙夜以安社稷為任于今且七載百度惟  
貞四夷面內薄海謐如也先是端公以公與趙夫人年  
高雖心在王室然時時有陟岵屺之思上及聖母聞而  
念之乃降璽書慰諭曰聞先生父母俱躋古稀康健榮

壽朕心嘉悅特賜大紅蟒衣一襲銀錢二十兩又玉花  
墜七件彩衣紗六匹乃奉聖母恩賜咸宜欽承遣家僮  
往賫之端公知上倚毗切且被恩禮隆異于是不敢復  
言私公每遣人端公所必彊飯示健用寬釋其意若是  
者久之昨歲秋杪忽以公訃聞端公泣血扣心毀頓幾  
絕亟請奔喪如制兩宮太后與上俱震悼徬徨降手勅  
丁寧諭留勉以社稷大義詞旨哀惻聞者隕涕賻贈慰  
挽既渥既勤黃門使者相望於道詔宗伯之屬往諭祭  
仍加祭五壇詔司空之屬往營奠事端公獨哀祈終制  
不已上焦然不寧諭閣臣曰元輔必不可離朕即百疏

不允盡止之某等以上意示端公復哀號上章并以母  
老為言詞益懇上曰元輔至情是欲塋父見母爾乃特  
勅中貴人在禁近者假歲月往為營塋并命端公子編  
修嗣修同往襄事即奉端公母入京申諭端公曰卿今  
其可留也端公以請益數上加恩滋降異既感且懼又  
念中宮將建以承宗廟衍萬禩其典至重乃不敢復言  
比贊成嘉禮亟申前請至再上不得已許暫歸治塋遣  
文武官各一員護行仍往還給傳以六旬為期賜勅及  
手勅敦諭速返仍賜銀印一曰帝賚良弼令便宜上封  
事賜以金幣及兩宮聖母賜賚優渥蓋皆古今曠絕未

有之興也端公既得請乃手曾司馬確庵氏所為公狀  
屬某為銘某辱知端公從游且廿年于公為通家子姓  
無能效一手足勞誠得奉執筆役附名羨通之石甚幸  
廼不敢以不文辭按狀公諱文明字治卿觀濶其別號  
也高祖唐妣沈氏曾祖旺妣王氏祖懷葛公誠妣聶氏  
父東湖公鎮妣李氏由懷葛公而下俱以端公貴贈如  
公官聶以下俱贈一品夫人其先鳳陽定遠人也國初  
始祖閔保以功授施州千戶子孫因家焉其分徙江陵  
則自懷葛公始懷葛公以陰德稱里中有三子而獨鍾  
其仲仲即東湖公也迨公生懷葛公喜曰果然是興吾

宗矣公幼警敏為文操筆立就才氣溢發弱冠補郡庠生閩西許少華氏智楚之學見公文異之以高等選入書院楚人士無不推轂公者顧數奇凡七舉有司不第當其時則端公業以神童顯矣比端公舉進士以翰林編修秩滿當貤封公曰吾束髮業儒自視非後人也乃四十餘而不遇成我志者其在吾子矣遂就封比端公引疾在告山居且六年儵然無當世意公不樂端公異公貌之日癯也竊詢之得指迺請治裝公大喜為益餐是時端公負公輔望隱隱然名重搢紳間矣出未幾遂侍穆廟潛邸繼參大政迨受遺輔今上揔理百揆振敝

綜功用臻世于大理公寔使之豈人力也哉公修貌長  
髯廣顙豐頰飄然綽約冰霜之姿類莊周所稱藐姑射  
之神人者任真坦率終其身不知有仇怨其與人處無  
貴賤小大咸悉無競又性喜飲酒善諧謔故嫺閭中無  
不傾心愛敬之有旨酒必延致公或載就公飲即衆譙  
無公弗成歡也性好施子遇所識艱窶者賙之無少靳  
其自奉則甚約每食不過三品端公歲時奉華服一御  
即歛置篋中妾媵鮮衣帛者端公聞弗宜也微諷之公  
報曰吾性固然且令後人師吾儉耳蓋其識量高邁如  
此公生于弘治甲子十二月十五日卒于萬曆丁丑九

月十三日得壽七十有四配趙氏封一品夫人子男四  
長郎端公次居敬郡庠生早卒次居易荊州右衛指揮  
僉事四川都司僉書次居謙舉人女一適邑庠生劉徹  
桂孫男十人嗣文舉人嗣修丁丑一甲第二人翰林院  
編修嗣允郡庠生嗣哲廕錦衣衛止千戶嗣弼嗣淵嗣  
寬嗣信嗣敏嗣惠曾孫男二女一俱幼勅建塋域某山  
之原塋期為戊寅四月十六日銘曰天惟純佑間世生  
賢熙運所乘地靈會焉山川出雲有開必先煌煌西楚  
世祖中興此焉奮迹配漢春陵公生其時名世是膺曰  
慎厥修里仁歸美曰富厥蘊溟解靡浹雉膏不食貽命



元子世皇有孫既聖且神元子于襄風化載淳俾高后  
業彌久彌新惟天有時自公值之惟地有靈自公萃之  
再世而昌有子嗣之功施于國篤慶在家存也榮豫歿  
亦光華子心何極天寵有加彼美崇丘承帝之域哲人  
所歸喬木可式玄堂有銘萬年考德

贈通議大夫詹事府詹事兼翰林院侍讀學士南  
野馬公暨配李淑人張氏合葬墓誌銘

南野馬公暨元配李者掌詹事府事禮部左侍郎兼翰  
林院侍讀學士自強之父母也歲壬申今天子踐祚上  
兩宮徽號覃恩加贈公通議大夫詹事府詹事兼翰林

院侍讀學士李加贈淑人其冬公繼配張卒侍郎自潛  
邸侍上經幄甚受知眷聞訃則以情請蓋淑人歿至是  
凡三十有七年而公歿抑已七年矣未合塋也天子惻  
然動心特詔有司營塋事賜之諭祭其恩數踰越常典  
若此再閱歲襄事有日侍郎廼手狀公夫婦世行以維  
附在姻婭屬之為銘按狀公諱珍字廷聘別號南野世  
居同州城南八里沙苑之馬坊高祖克敵曾祖馴太學  
生祖文父通大學生知博野繫峙二縣有庶能聲贈通  
議大夫詹事府詹事兼翰林院侍讀學士母雷氏贈淑  
人公兄弟凡六人公居其季最為父母憐愛早失怙補

學官弟子負文譽駸駸起矣雷淑人固不欲以文事勞之遂奉例為國子生公美姿容殊髯豐順眉目秀偉正視不見耳膚理白膩若玉人望之知敬乃其器量豁達不設城府即之者又未嘗不親也其在太學尚友四方士講明世務意趣甚遠乃四方士無不樂與公交曰從禹公游不異飲醇醪也比為宛平丞潔已受民事至類迎刃解甚為僚長所重會世廟覃登極恩獲贈封其父母是時東廠官校襲正德中餘焰往往以事撓縣官憾公不為動則招撫瑣事誣抵之公弗辨將拂衣去或謂之公曰吾母春秋高矣吾四兄卒于宦者三一不及貢

吾不歸何以慰倚閭望也矧京邑多不可問而丞且負  
予已矣吾不忍詭詭與宦豎爭一官也遂歸蓋歸八閩  
月而雷淑人卒年且九十矣公既承晨夕歡而復哀慕  
深至殯葬盡禮鄉黨稱孝焉公性故好學居常手一編  
自娛見古人忠孝節義必嘆賞不置其教子甚嚴率以  
鷄鳴呼燈火祁寒不易故皆有成立家舊饒裕然公博  
愛好施用財不訾省有無雖嘗子貸錢穀卒無以自殖  
人或不能償即與析券鄉人習公長者或併緡本隱沒  
之亦不與校也有渭南故吏窶者每秋成謁公輒細載  
而歸以為常初公童時在博野就外傳見丐者憐之歸

而涕泣不能食父竒之曰此兒能仁異日必衍世澤蓋天性然也生平不疑人欺不言人惡敦倫樂善恒如一日諸兄既皆早世公撫諸孤不異己子兄璠遺有幼女公奉雷淑人命子育之長配張拱極生子今舉人薇方公任宛平時都中大疫姪東中以承差辦事禮部染焉時方盛暑疾勢甚殆公移置同室與之對榻撫視之兩月餘始復人以為難歲時宗族子姓來謁必分曹面誨士以讀晨以耕動動懇懇冀其能立其諸里鄰囂爭不論巨細公一言析曲直即帖然兩解故鄉人無少長遠近無不愛敬公公嘗患額瘍里中相與醵金剗牲以額

神至數十百人此不易得也公性不善酒稍飲即面頰  
顧獨受客每與里人故舊為燕樂談笑連日夜不倦方  
侍即官翰林時迎公養京邸與四方縉紳耆父結社風  
日佳美即選名園勝境出而遊覽之都人至今相傳以  
為勝事淑人家為左輔望族父某母乞氏性婉慧凡女  
紅滌漚咸不假師授而能稟賦剛正不妄笑語遠識敏  
斷不類閨閣中人其事姑最孝敬當公兄瑜之歿也公  
時任宛平遺淑人歸慰姑且為長子娶淑人曰猶子芥  
長姑視之等孫也遂兩為奩其姑乃大悅姑病淑人私  
卜之不吉驚而仆有頃乃甦其深愛若此育諸子最慈

然不忘訓督公嘗遊蜀諸子間元夕出嬉淑人詢知之  
召長跪堦下譙訶之命焚所業書諸子懍懼請罪暨諸  
從子同跪謝始解已復大哭其嚴如此至于躬履儉勤  
雖貴不改凡賓祭塾序之需 黨往來之費皆先事為  
備故公居常暇逸絕無內顧雖其祿度冲邁寔淑人贊  
成之也公生成化己亥十二月七日卒嘉靖丙寅八月  
二十日享壽八十有八淑人生成化壬寅十二月十四  
日卒嘉靖丙申三月十六日享年五十有五公維祀張  
氏者朝邑縣之楊村人亦能摠理內政顧復諸孫性不  
喜華飾而好周里婦之貧者生弘治己未十月十七日

卒隆慶壬申十月二十八日享壽七十有四公四子皆  
叔人出伯自勉國子監助教娶楊氏仲即侍郎自強娶  
李氏封叔人叔自修娶王氏季自道州學生娶王氏孫  
男八慎娶張氏忱州學生娶王氏恬娶陳氏怡舉人娶  
楊氏協州學生娶李氏憬州學生娶李氏慥舉人娶維  
息女惺州學生聘李氏夔州府知府從教女孫女七長  
適大學生張恒次適劉采次適州學生張思齊舉人藻  
子次適睦邦教次適王守仁次適李涵次適王訓曾孫  
男十一橋朴梧俱州學生格櫟柅机林柱檢棒曾孫女  
七長字李傑次字某餘幼銘曰猗太華之陰北距洛溪



有美淳風惟仁人之里恩施既博物無不被碩人述焉  
同德齊軌是錫胤祚爰興國士正誼純誠媚于天子孝  
思玄通恩卹甚侈王人營兆驚文論祀桂茁蘭芽烝烝  
未已厥惟顯道武增來祉煦煦者原堂封崇只萬世有  
辭考德在是

封通議大夫禮部左侍郎兼翰林院侍讀學士澹  
齋王公墓誌銘

萬曆甲戌八月九日誥封通議大夫禮部左侍郎兼翰  
林院侍讀學士南昌王公卒于家距其生弘治丙辰享  
壽七十有九公仲子掌詹事府事吏部左侍郎兼翰林

院侍讀學士希烈方被專命總史事後公計則摧慟以  
情聞天子感焉詔有司營塋域遣官諭祭如例公初以  
嘉靖戊午封翰林院編修隆慶丁卯進封侍讀戊辰進  
封國子監祭酒萬曆癸酉進今封前後凡四膺綸誥其  
歿也復恩卹隆備若此哀榮壽考蓋都生人之具福云  
侍郎卜於某年月日塋公于臨川麥岡山之阡勅所營  
兆乃託禮部右侍郎漳浦林公狀公世行徵余誌而銘  
之以余托契侍郎為公年家子而林公復侍郎門下士  
俱知公故也按狀公諱恣字廷望以字行號澹齋先世  
臨川人其徙南昌自五世祖本淵始曾祖敬符祖紹甫

父崇禎號介軒以侍郎貴贈如公官母喻氏贈淑人初  
介軒公感竒夢生公故命公小字曰閏龍以志其異比  
長淳篤謹厚出入循循甚飭性穎敏出就外傳學即為  
弟子高等家故無餘貲嘗游學宣州之黃池主人甚賓  
禮之歸而奉親備極色養介軒公性方潔不苟殖貨利食  
指日繁蕪之賓祭諸需日不暇給公節冗蠲浮以佐之  
不以一縑自私用能得懽心焉介軒公家政方嚴子姓日  
會食一堂逡巡甚肅公年高矣每飯必侍側夜則依膝  
前承訓問俟即安而後退比居二親喪年且六十其哀  
毀不異少壯人終其身歲時生忌薦享必涕泣蓋其至

性如此待二弟恩惠友愛備至內行修謹室無媵侍閨  
門之內雍雍如也公質直坦夷不為崖岸雖命數荐錫  
而目視常如布素時諸里社耆舊夙昔從公游者歲時  
過從相與飲宴笑譚亦忘公之貴也其襟懷洞豁秀眉  
修髯人望若神仙然居常恬簡不自銜材智澹于世味  
而惟喜為近體詩諸所倡和興至立就晚年精神完固  
能于燈下作蠅頭字兀坐一室行吟自得留心內典積  
佛書盈二藏矜貧好善尤樂于施予由是大為鄉人所  
懷每肩輿出行無論里社城市咸老稚歡迎謂為佛至  
及公歿則遠邇奔赴如哭所怙恃云公配徐氏累封淑

人子男四人伯希昂府學生娶李氏仲即侍郎希烈娶  
李氏累贈淑人繼戴氏累封宜人贈淑人叔希元國子  
生娶吳氏繼陶氏張氏季希佐國子生娶樊氏女一人  
適潞河巡檢鄧一治孫男十時聖時武時霖時成昂出  
時文官生烈出時麟元出時純時熙時錫時命佐出孫  
女四曾孫男五國王國珎國相國瑞國祥銘曰含醇履  
臧粵秉德自躬不顯其光孚化于鄉既壽且康爰濬厥  
祥再世而昌惟德之茂惟邦家之慶叶 撫撫麥罔帝命  
共工營封若堂永錫爾祉祚萬祀未央

光祿大夫太子太保禮部尚書兼文淵閣大學士

贈少保謚文莊乾庵馬公墓誌銘

關中古都會地當漢唐代蟬聯樞揆不可勝紀顧自明興末名臣碩卿勲代相望獨未有參政地者迨萬曆戊寅馮翊馬公始由大宗伯承麻拜云公負公輔望久當是時以舊學受眷知上所注意甚厚海內士咸訢訢謂關陝地靈二百年始發于公必且抒所素蘊以協贊中興偉烈不偶然也俄而公被未疾以歿吁可悲矣余與公周旋三十年知公深纂遺行徵不朽宜莫如余者顧心內傷公每援筆輒泣然不知涕之無從也蓋逾年始克誌而銘之誌曰公姓馬氏名自強字體乾別號乾庵

陝之同州人也自其先世居州城南之馬坊頭有諱和卿有生克敬克敬生馴太學生公高祖也曾祖文祖通知博野繁峙二縣又珣宛平縣丞母李孺人自曾祖而下咸以公貴贈光祿大夫太子太保禮部尚書文淵閣大學士妣皆贈一品夫人初李孺人方娠公夢龍繞室宛平公亦夢南極老人以緋衣兒來送比公生頭角嶄然不類凡子父母竒之幼警悟自知學校章句即解其大義十歲能文年十四補郡庠弟子負嘉靖庚子舉陝西鄉試第一聲名籍甚顧屢上春官不偶益潛心下惟精進不懈已復携群弟子修業于太華山之青柯坪癸

丑登進士選翰林庶吉士故事吉士年長者總挈諸務  
曰館長人多匿年避之公年在數人下獨不避諸所綜  
理咸盡善愜於衆心前後鮮及之者乙卯授翰林院檢  
討甲子滿九載陞修撰是時重錄永樂大典被命為分  
校官丙寅丁父憂丁卯以重錄大典書成加侍讀己巳  
服闋起司經局洗馬管國子監司業事庚午回局兼翰  
林院侍讀充經筵講官纂修肅皇帝實錄是秋典應天  
府鄉試公品校精審凡三為會試同考官及是榜所錄  
士咸稱得人陞國子監祭酒公見科餘漸弛失教學初  
意毅然以振飭自任首按群不逞習為姦利事者剗剔



積蠹悉取累朝訓典申明之絕請托抑躁競厲學官日以正學廸諸生于是成均中爽然易觀聽焉時生徒大集有需次經年不及撥歷者公上疏請損諸司歷事期而增其名額諸生有貧困不能自給者輟周之故士初憚公已無不愛且敬者辛未陞詹事府少詹事兼翰林院侍讀學士尋掌院事是時上在東朝言者請妙簡端方士備輔導故遷公宮尹士申上出講學遂以公為講讀首臣公念上方冲齡凡所進講不為微文奧義務取目前易省事款款曉譬冀有所感動歲度端詳音吐洪暢上聞而甚悅以告穆考有時講退于幄後嘖嘖歎美

衆咸聞之陞詹事兼教習庶吉士上登極擢禮部右侍郎充日講官尋轉左掌詹事府事丁繼母張氏憂歸上時時念之嘗與元輔張少師言公所講解易省久之又時問公服將闋未也乙亥守臣以公服除聞詔添註詹事府以原官協理府事充實錄副總裁日講如故抵京陞吏部左侍郎會禮部尚書缺廷推以公名請上遣中使問閣臣尚書兼日講否張少師為言講臣須清心專慮而禮卿部務煩重勢不得兼狀乃陞公禮部尚書兼翰林院學士罷日講仍充經筵講官蓋特命也時宗藩繁衍諸請名封婚祿歲以千計中多詭冒年越而先後

條例亦自相牴牾以故王府科宿習其穴竇交結諸藩狡倖出入為奸莫可究詰公一一清其源本擇條例協于情通行無碍者為準其一時有為而設彼此刺謬者悉屏去之今禮部新題更定宗藩條例多公所具藁也法守既定乃斥汰諸積胥之尤無良者凡王府章疏主必親為裁決隨榜之部門明示行止由是諸掾隸無所索賄公字肅然隆慶間嘗罷張真人封以提點世其祀及是提點來朝請復封公寢其奏提點固請不已公上疏歷陳其不可且請嚴杜賁緣請乞之隙無啓倖門語甚剴切初比虜通貢市儀部所議爵賞有定額矣乃

虜欲無厭請寢溢額公明其非計請申明初約凡一切  
額外乞求令邊臣勿復通令甲所載文武大臣卹典節  
年條例增損子奪靡準公審詳叅校議為畫一之法奏  
之報可著為令丁丑知貢舉世廟實錄成加公太子少  
保戊寅二月進太子太保文淵閣大學士入閣辦事公  
雅有康濟志以古人自期待感幸知遇夙夜孜孜有  
以自效會夏秋之交暑雨偶感瀉痢疾久不愈竟以十  
月十三日卒距其生正德癸酉十一月初二日得壽六  
十有六耳訃聞上悼惜深至輟視朝一日賜賵賻含槨  
之具甚渥贈少保謚文莊加祭至十一壇廕一子中書

舍人遣行人護柩還工部主事督修塋兆凡所為哀榮  
卹終之典視禮臣所議悉加厚焉蓋上所惓惓注眷公  
者其恩禮始終不替益篤如此惜天不假公年不及大  
究厥用為可恨也公隆顙方頤鉅耳豐背舉止凝重儼  
然山立見者知其正人其操尚端嚴凡立身施政務行  
心之所是不欲一毫苟徇于人無容博愛發于至誠見  
一人一物不得其所必疚然思為濟之故平生卹困周  
急惟其力所可為如恐不及見不善感然若將挽已雖  
甚嫉惡而弗徵於聲色以是遠于憎忌人有片長寸善  
汲汲樂與之自以為不如也蓋其德宇淵宏造詣深邃

誠心直道貫乎表裏始終無間然矣性篤孝為諸生時  
李孺人病貼危齊心祈神祐姪應第者弗知也夜夢神  
告之曰語若叔而祖母數定矣其精誠感通如此事父  
宛平公樂志承顏備極無方之養居喪孺慕有烏鳥數  
百旦夕翔集其廬人以為孝感所致云公配李氏累封  
一品夫人子男二人怡舉人娶楊氏愷進士兵部職方  
司主事娶余息女先公十二日而卒女二人長適指揮  
余事張恒次適選貢生張思齊孫男二掇楠孫女三一  
字司務高嶽子起鵬一字編修盛訥子以弘一字知縣  
張薇子祇若銘曰昔在殷宗有臣其傳迪德褒猷式弘

湯祚公兼其選侍帝中興金華初直玉鉉竟外左輔神  
臯嶽瀆蘊秀閱年二百毓公大受立朝三紀正色垂紳  
清風終始卓爾名臣執經旃厦陳義惟晰讜論格心宸  
聰載懌視篆秩宗張陳鴻典議政于廷告猷孔善聖主  
深知衆區繫望天不慙遺哲人遽喪惋彼濟川中流楫  
傾煜煜箕尾不泯厥靈在洛之涘川原窈窕豐碑崇墉  
承恩建兆若堂者封公歸在中  
有銘考德傳信無窮

資政大夫兵部尚書田

霍公墓誌銘

當嘉靖末載朔方虜數侵暴西塞歲必三四入入必旬  
月乃去自郡邑城郭外遠邇鄉社攻毀十七八虜聯營

帳駐塞內戎騎三五散掠數百里外無櫻之者於時朝廷深以西事為憂乃陞戶部右侍郎霍公為兵部左侍郎兼都察院右僉都御史總督陝西三邊軍務公受命則倍道入關首詢諸死事者厚卹其孥汰除諸將佐不職者簡武勇以代之於是募丁壯補車騎穀甲冑繕亭障礪器械激忠義比至秋防軍容一新萬旅競奮亘長塞數千里旗幟刀斗色相映聲相聞也終歲虜遂無一部敢並塞窺者公乃飭諸鎮同便襲擊其帳延綏寧夏各奏塞外捷虜人憚之隆慶丁卯冬威寧諸虜分衆十餘萬東自薊鎮義院口入犯灤水戍昌黎西自山西偏



頭入犯嵐汾攻石州破之軍書東西告急畿輔大震是  
歲莊皇帝初踐阼憤武事之不振毅然圖所以易絃輓  
宣威畧者深惟兵本之重慎簡厥任乃進公為兵部尚  
書公料天下戎馬疆弱邊塞要害及諸將帥材勇高下  
總統經畧劑量而幹運之机應曲中方內無警天子甚  
倚賴之俄內江趙文肅入叅執政文肅恢詭好奇節而  
不諳事理捥腕攘袂以詰戎自任始欲更營制又欲法  
外誅邊帥之小有亡失者公皆執不從因之大迂公乃  
引疾乞歸至再若曰臣職典兵而趙某每事相掣曳即  
有疎失將誰任其咎者臣不能與其事矧又病願賜骸

骨歸許之迨上登極言者屢薦公可用幾欲召之屬公  
嬰末疾有待也未幾而有司以公計聞天子軫為遣官  
營葬事賜謝祭如例公子國子生鍾瑜手前河南左布  
政使孔公夫胤所狀公世行問銘于余余故知公者公  
負亮節材蘊甚宏偉即所表見固已章灼瓌異要為未  
究其用乃天不憖遺不得以其所長盡效于邦家余蓋  
深惜之乃不辭而為公銘按狀公諱翼字堯封號思齋世  
為汾州孝義縣人祖鳳贈兵部尚書父文會歷封兵部  
尚書母郭氏封夫人公幼學稱神童勤苦自勵家貧夜  
或乏燈火則依月光誦習之年十五記經書子史數十

萬言嘉靖丁酉舉于鄉甲辰登進士授永平府推官以  
績最茂申召入授廣西道監察御史庚戌清軍浙江上  
言南北燥濕異宜勅之遠戍非人情不可久請無拘故  
籍俾臣得以便宜補附近伍缺庶收實用朝議以為允  
令布其法四方迄今行之癸丑巡按河南會妖賊師尚  
詔作亂時撫臣以陞任去代者未至公多設方畧檄諸  
文武将吏乘其未定急擊破走之地方以寧丁巳陞大  
理寺右寺丞尋轉左戊午陞都察院右僉都御史巡撫  
寧夏在鎮凡三年戎事甚飭烽警稀少虜嘗一入塞輒  
被衄去天子聞而嘉之賚以金綺庚申移鎮保定畿右

歲祲盜賊蠭起公至申嚴武備首發庫賑飢民賴以全  
活甚衆盜乃解散辛酉召入佐院事其久薊昌宣大競  
以缺餉告大司農言四鎮歲中所出內帑錢視曩時已  
什伯天子疑之詔遣戶部侍郎忠直有心計者一人往  
稽其弊時戶部二侍郎不欲行廷議亦不擬二人者乃  
進公戶部右侍郎以往公徧歷疆場盡得其耗蠹假冒  
之寔而奏之因條上恤軍通商轉輸積貯便宜四事皆  
見嘉納初公既行戶部二侍郎皆罷而公復按撫監兌  
卽某于法故怨讟朋與相與搆為飛語公坐調為南京  
工侍俄而誣明改南京兵侍乙丑改戶部右侍郎兼都

察院右僉都御史巡撫山東東省徭役不均民甚以為  
苦公為平之治河之役困于調集公檄郡邑徵丁銀輸  
工所既近河居民應役公私以為便丙寅陞刑部左侍  
郎其冬遂受總督三邊之命再閱歲筦兵本庚午謝政  
歸家居凡五年餘以萬曆乙亥三月二十六日卒距其  
生正德丙子正月二十九日得壽六十公配張氏封夫  
人子男四人長鍾瑜國子生次鍾琦鍾珂鍾琳孫男亦  
四人某某公雅有人倫之鑒佐郡未平時今少司寇樂  
亭王公與其兄楚雄太守俱以諸生為怨家誣構于理  
公一見稱異為雪其誣慰遣之曰二賢善自愛行達矣

司寇兄弟其秋同舉于鄉在兩浙日有周生者按籍當  
補成公賞其俊茂為詔其藉周生後登進士今為廣東  
布政司叅政銘曰夏卿樞府邦政攸宇譬彼大廈任材  
則巨榱榱惟公洵文且武當險不驚在微能睹爰挈戎  
韜九有雲消邊城戢戢胡為不驕昔在正德嘉靖之世  
曰王恭襄曰楊襄毅以迨于公三同馬氏惟晉之良光  
于有位帝念崇功恩卹孔隆綸文悼忠王人視封遵彼  
橫汾鬱鬱玄宮勒石有銘用諗于無窮

嘉議大夫南京禮部右侍郎前峯孫公墓誌銘

南京少宗伯前峯孫公既卒之明年其伯兄今太常公

龔弟侍御公鏐以公門人翰林編修韓君世能所為公  
狀徵銘于其友人張四維嗚呼維安能為公銘也維自  
釋褐公相與為莫逆交者且廿年矣公意氣豪邁每吐  
心論事琅琅動人余與之居相比而心相近也間離居  
則思其容聲未嘗不在眉睫間蓋至今猶爾詎意公乃  
長遊耶故每據狀援筆輒泣然不可止余安能為公銘  
然公蘊負淵邃不事表暴諸所自期待其見于施用者  
未究其十一余既知公深則所以撫寔宣隱俾有述于  
永世者豈異人任哉嗚呼余又安能不為銘也公諱鉉  
字文和初號正峯後更曰前峯先世為睦州人後唐明

宗時有三司使諱岳者卒塋餘姚燭湖子孫遂為餘姚人宋淳熙中有進士燭湖公諱應時者明興有山陰學教諭公諱原彞者蓋姚江稱華胄者推孫氏為公曾祖新贈資政大夫禮部尚書祖燧巡撫江西右副都御史累贈資政大夫禮部尚書謚忠烈忠烈公死節江西朝廷錄其後世襲錦衣衛千戶由是隸籍錦衣云父陞資故大夫南京禮部尚書贈太子少保謚文恪母韓氏贈夫人以嘉靖戊子正月十七日生公公生有異質讀書一見輒成誦日記十餘言操觚為文咄咄立就初不經思而意致空濶英采煥發見者靡不異之弱冠補京庠



弟子負領嘉靖己酉順天府鄉試第一癸丑登進士選翰林院庶吉士讀中秘書聞見日富乃力為古文詞每閱識輒高等乙卯授翰林院編修自以身為國史耻一物之不知乃取家故所藏經史百家之言與夫國朝典憲及騷人文士之所稱者窮日夜之力而披涉之隨闕所居屋後為精舍四楹約金輦二三寮友相與講習論究志趣甚銳俄聞文恪公訃南奔廬于墓所三年族姓子弟及旁郡文學來受業者甚衆服闋復除原職受詔分校永樂大典纂承天大誌誌成有金帛之賜隆慶丁卯大典完晉左春坊左中允兼原官賜五品服尋充經

筵講官管誥勅纂修世宗肅皇帝寔錄是秋貳今少宰  
東岑王公典校應天府鄉試得人為最士之登春榜者  
視曠昔獨多其冬陞論德無翰林院侍讀掌司經局事  
己巳陞國子監祭酒振規條飭廢陞每季試諸生必梓  
其文之優者六館翕然頌服之先是莊皇帝覃登極恩  
詔天下郡邑自歲額貢士外許不次拔其異等者斥之  
國學曰恩貢庚午秋輻奏至矣公閱其才美乃上疏以  
廣科額為請天子許之是秋兩京鄉試增至一百五十  
人則公所推廣德意也居頃之陞南京禮部右侍郎公  
體素碩健精力過人幼歲讀誦綴文每徹曉不寐當營

文恪公薨時或十餘旬晝夜不交睫以為常其強如此然以世家子應酬自倍公又事事周慎務為敏捷四方徵索詩文雖旁午必以時給人每以此多之公亦雅自意不自愛嗇比較修典志代宣綸綽乃至寢食俱廢精力遂大減于曩特初苦肺病勞動則作喘而體膚殊振慄畏寒亦間有瘳時然每發必視前增劇余心慮之及赴留都竟卒于白下舟中時庚午十一月二十六日也得年僅四十有三悲哉公磊落有大度視宇宙內事若無一不可為者嘉靖末中外多故遇時事有不當意輒慷慨振腕恨不以身任之性警敏有膂力凡事試為之

若素習初公伯考都督孝子公喜騎射精天文公一得  
于聞見即能挽強命中且指畫列宿垣次歷歷不紊孝  
子公特鍾愛之文恪公在詞林時日與寮友吉水尹公  
閔中王公內江趙公論文講藝或至夜分公必潛聽不  
去故童年為經義即莊古不類時製天資強記凡遠年  
近歲諸公私內外巨細事無論人已但耳目所接語及  
即能道其時日曲折或有疑者則曰同日更有其事某  
事及日前日後旁証連旬乃已真足竒也為人豁達無  
它腸與人交一見出肺腑相示人有求必盡其心以圖  
之期以有終寧後已事其興致豪爽好客而飲酒能數

斗不訖每讌集必觥斝交錯雜以諧謔人人盡其懽而後止而又個儻好義憂人之憂塾師孫駕部庠師汪司訓座主楊通政歿于京為悉心理其後事軫故所知葉通判羅貢士家如其生然尤篤厚倫理孝友天植五歲執韓夫人喪哀毀如成人事繼母楊氏太夫人服其訓出入必慎凡事承顏後行終身無色忤事從兄都督公伯兄太常公情愛終始靡間諸弟若侍御公舉人鑲京庠生鑲皆公所親教蟬聯取科第未已衣食供奉所需出其奩資祿入無論彼我歲時享家廟合族上壽雍雍如也居常不問生產卒之日乃無以贍殮事公配魏氏

封宜人南京工部尚書魏公有本女生男一如江聘姜氏行太僕寺卿子羔女女二長許聘禮部員外蔣勸能子某次許聘知府楊世華子某側室任氏生男一如洹幼公所為詩文甚富異日當謀諸公昆季彙而梓之銘曰代運熙明是生哲士家慶載昌行惟材子萃梧鳳栖茁護麟趾天人可徵物理固爾矯矯惟公身都其美承家以孝華國有煒惟祖有烈曰紹厥祉惟考有文曰遵厥軌細旃講道百辟傾耳三代炳風雨朝信史方引厥緒未究厥指天意謂何中道遽已撫撫崇軒寶幢之阜公神在天體魄藏此栢檜相望祖考具邇永利嗣人于

千萬祀

都察院右副都御史澤山馮公暨配恭人趙氏賈

氏合葬墓誌銘

公諱舜漁字澤甫別號澤山馮氏先世河南龍門鎮人  
遠祖諱俊者當金源氏時至蒲生子直為萬戶招討使  
鎮河中子孫遂家焉傳數世至公高祖祥以行誼著聞  
歿祀鄉賢曾祖盛舉人秀府紀善祖從政舉人歷尹河  
陰汲縣父紹歲貢任鳳陽縣學訓導以公貴贈按察司  
副使母鄭氏封太恭人公幼而穎慧性倜儻弘達每作  
事發言輒出儕輩意表方從童子師習聲偶時即隱隱

有聲州閭中比長益肆力問學厚自期待嘉靖己酉舉  
于鄉癸丑登進士第甲寅授山東臨淄知縣時江左暴  
有倭患公以治邑最選調蘇之常熟常熟在蘇為上邑  
寇所特垂涎者公至則多方調度練武勇儲軍寔築福  
山堡申固長江之險民賴以無恐加意撫摩省浮費  
尤良于蔽獄有貴游子弟舟行被刺而賊不得前政為  
根補蔓引歷歲矣比公至則廉獲真賊人大以為異戊  
午陞戶部福建司主事壬戌調兵部職方陞本司員外  
武庫司郎中兩部咸有能稱癸亥陞山東東昌府知府  
東昌當兩京孔道供應煩浩民力詘不能支公為裁節



冗費取給而已亦不廢禮由是民累頓紓經行者無尤  
爲乙丑陞湖廣按察司副使整飭蘇松常鎮等府兵備  
時倭患稍寧矣會虜犯黃甫川勢張甚復調公陝西按  
察司整飭延綏兵備隆慶戊辰三載考最當遷適地方  
有荏苒不靖督撫交章留之乃加公銜布政司叅政仍  
舊兵備延綏辛未陞陝西按察使治獄平允先是地方  
礦賊猖獗有司會兵捕緝累老弱甚衆公獻其無辜者  
一切釋遣之西人以為德尋陞右布政使壬申轉左陝  
稱劇藩財賦出入最為穰夥歲供三邊餉以億萬計之  
胥因而傍緣為姦主者不能察甚或乾沒其間民應博

輸役者往往輒破家公在陝日久知其病及是則痛釐  
革之諸以轉輸至者投牒而退正賦外無毫釐餘費由  
是頌聲翕然抽于閩隴司所轄凡八府各州縣租賦供  
京邊者悉由府起解藩司轉牒而已西安因治在會城  
近歲乃以其府屬州縣租賦徑納藩司轉運而府不與  
焉公喟曰非政體也會府固多事其視藩司何若乃議  
白撫按牒歸該府撫中丞是之而按史以為未可俄承  
特簡擢公都察院右副都御史巡撫延綏贊理軍務按  
史遂以為不聞新命也者撫它事以布政使劾之公竟  
聽勘而歸時萬曆癸酉春也久之其事勘明悉誣指無

實三秦人士至今為公不平公事親孝當謝政時太恭人猶在堂年高矣公養志承顏曲盡愛日之誠比殁孺慕哀悼喪葬以禮至于惇睦宗族致厚親友賙貧卹患諸皆可稱公稟受龐厚方順廣額修髯豐背望之偉然飲食無人自幼至壯未嘗近醫藥性豪率不耐拘拘為小謹方其志學從宦每有物外情初年嘗居業城南中脩山麓曰鄭庄者其地水竹為一方之勝比返初服乃繕屋編籬襍植花卉歲時拉朋輩游燕其間或洽旬不返乘小車出入綸巾野服見者不知其為達官也萬曆壬午十月二十七日忽不憚遽整冠服而逝距其生嘉

靖癸未十一月十二日享壽六十元配趙氏封安人再  
封恭人生嘉靖癸未七月十三日卒隆慶戊辰八月六  
日得年四十有六繼賈氏生嘉靖甲寅六月二十八日  
卒萬曆戊寅正月二日得年二十有五繼李氏子男六  
人淪舉人公卒之明年亦卒娶楊氏洲早殤津娶楊氏  
源聘楊氏湧聘傅氏湘聘楊氏女五人一適張近光一  
字孫守節餘幼孫男二惟榮聘杜氏淪出惟光津出孫  
女一適官生王之柱嗚呼公宦蹟南北最為人所歸德  
無如在陝轄顧竟以此罹謗賦氣既厚神情又瀟灑脫  
世羈即期願可躋而年僅若此謂之命數非耶余與公

髻亂交兩誡皆同舉當發酉公歸余以謁告在里方相  
與徇祥結鄉社甚懽矣余尋復被召塵三事荏苒且十  
年邇歲不禁多病日夕思撰杖屨從公也頃罹先人憂  
還故丘則公已不待矣悲哉公子津為公卜兆于鄭庄  
之乾隅將以今歲乙酉三月十五日營公葬并遷趙恭  
人賈氏二柩合祔焉禮也乃持余表舅臨朐教諭兩泉  
孫公狀請余銘余久不近鉛槧乃慨公去世未幾而長  
子殞也聞津能舉公殞則嘉之且有深感焉特不亂而  
為之銘銘曰蒲有著姓曰惟馮氏戎閭開家鄉祠樹紀  
載世其家科名接軌南宮論秀寔自公始盤錯投艱簡

書屢委舟車所至民獲休祉膚工未竟避道中止淵舊  
是依凡杖樂只南有嘉原土澤淑美生所盤桓沒寧歸  
此凝和衍祥萬年不毀

中憲大夫都察院右僉都御史石山裴公暨配陳孺人

墓誌銘

隆慶丁卯七月十九日都察院右僉都御史裴公卒于  
家距其生正德癸酉六月六日得年五十五爾初公巡  
撫陝西時中飛語聽調里居于時五菴矣會今天子登  
杜接楊遺碩六科十三道交上疏薦公任大用詔報可  
朝夕且賜環迺公忽以訃聞天子悼之特頒諭祭一壇

公階四品不滿一考於法未應賜祭蓋異教云公神宇  
冲粹涵蓄甚富與人婉款有情恂恂自將見者起敬至  
于論當世事辨人臧否稽合古今同異侃侃焉出之有  
緒而不紊也性故好學發而為詩文清潤雅飭如其為  
人尤喜接引後進出其門者彬彬多如名士當嘉靖丙  
辰丁巳時公居內艱余亦罹先宜人之變與今太傅家  
宰楊公及余舅督府其侍王公俱守制在里余因獲從  
三公者講業于楊公北墅大椿堂中見公外溫內理不  
為巉岩皴異之行而中截然不可犯根心出言無纖毫  
矯飾其致可欽也謂公且宏濟于時不且充所解詣磨

礎浸漬登作者之城詎謂中壽未躋乃奄爾物化耶悲哉公歿之明年其配陳孺人亦卒子徹熊輩將以其年某月某日合塋于孟盟橋新兆乃走使京邸持公婦舉人楊俊士所為公夫婦狀屬余銘之按狀公諱紳字子書別號右山裴氏故為河東族望公系出聞喜晉公度之後勝國時有澤民者以功授銀符為達魯花赤領平陽事始定居于蒲澤民子居敬陝西行省叅政居敬子約文奉元總管數傳至公曾祖瓚祖英俱隱德不仕父鼎以公貴封文林郎河南道監察御史母張氏封孺人公幼警敏能日記千百言未總角即為學宮弟子負試



輒占高等嘉靖甲午舉于鄉戊戌登進士授行人司行人辛丑選授河南道監察御史督理長蘆山東鹽課近京多姦民依憑城社私販公首擒鄭尚書僕置之法仍對仗彈尚書奪俸比公代逐無復私販者乙巳按真定是時虜連寇太原公乃議增紫荆諸關埤塹事竣有白金文綺之賜丁未按浙江上海防六事詔悉從其議蓋是時海盜漸不靖矣朝設都御史督軍務而都御史者顧捕戮平民報首功公檄臬司問狀都御史廼大恐公以其不克肩重任故言其事自海寇益猖諸建曰防禦計無慮數十上率無越公議者戊申丁御史公憂辛亥

起復陞山東按察司副使提督學校崇實學杜請謁諸  
所獎拔悉蘊藉有養之士乙卯陞河南布政司叅政撫  
守汝南其冬丁張孺人憂戊午起復補四川布政司叅  
政庚申陞陝西按察使辛酉陞河南右布政使未越陝  
即拜都察院右僉都御史巡撫陝西壬戌春虜犯延綏  
公聞警提旅馳赴之過其南下于是朝議謂總督公某  
不任事擬以公代之未果其冬虜復自寧夏入公督衆  
迎拒斬首虜十餘級以捷聞乃益為內地備簡西安等  
衛卒三千人奏設叅將一員團練會城陝當漢蜀孔道  
民苦于供億有忻城伯某者使蜀過陝又特稱貪虐公

庶得其不法狀數十奏之且請自今勲臣出使毋得枉道上命著為令併徵忻城伯還忻城伯懼自殺秦地肅然初公督學山東時有一二鄉宦求庇其不肖子弟不得則大惠已乃作為謗書徧騰之兩都中當丙辰時既撼公不動益慙憤至是歲癸亥屬京官考察期復以游言中公甚異賴當道者稍稍知之乃奏改公南京公曰吾矢勤于國而顧憎此多口命也遂歸卧河山舊廬課于明經尋繹故業日與故友嘯詠杯酒間若未嘗涉世者山西巡撫若延安楊公南昌萬公鄭州王公海豐楊公維縣王公先後各以公之德美䟽聞于朝公配陳孺

人者鄉賓瓚之女也鄉賓公娶于杜而生孺人幼惠朗  
不妄言笑鄉賓公竒異之不以于凡子及笄歸公事舅  
姑以孝稱綜理閭政既勤且儉公用無內顧憂孺人素  
碩自公歿日益羸削閨中常若與公語者不浹歲亦歿  
隆慶戊辰六月十二日也距其生正德丙午十一月七  
日得年五十有三子男二人胤熊娶楊氏胤勲娶李氏  
俱州學生女四人長適舉人楊俊士其次經之其次適  
官生王益其次適潼關衛指揮應襲陳汝孝孫男一令  
聞聘楊氏孫女一幼俱熊出銘曰河東諸裴歷葉有聞  
入宅廣睦綠野流芬參政嗣興北岡有墳爰逮中丞丕

闡厥文璆璽音希幽蘭氣薰射策成名乘軒問俗頌條  
郡國乃罔不肅東上傳經西藩推轂亦既軒騫永願未  
卒聲舟夜空斯人不淑溫溫者媛同德作配存共厥榮  
歿偕厥悴于澗之濱豐原有隧雙壁永歸德音不晦

中憲大夫都察院右僉都御史孝泉王公暨配封

恭人何氏合墓墓誌銘

公諱輪字子庸別號孝泉姓王氏自其先世以造香油  
為業故州人推著姓必曰油王氏云高祖太一曾祖健  
祖寅父珪母張氏以公貴父贈都察院右僉都御史母  
贈恭人公以正德丁卯二月初五日生初公祖歿贈公

方在遺腹祖母嚴年僅二十餘大志撫孤百艱不替及  
是生公頭角嶄然不類凡子人咸謂天道有知也公生  
甫踰朞即失母且多疾祖母嚴特憐念之身親鞠有朝  
夕備極慈愛夜宿之榻傍晨覺必呼名諄諄詳迺年十  
三乃已公稟賦既茂而又夙陶慈誨故自成童即有英  
聲閭閻間長老咸以異人視之嘉靖乙酉補州學諸生  
戊子舉子鄉時祖母嚴年八十餘矣猶及見之壬辰嚴  
歿癸巳贈公復棄養公既終喪乃居業河汾之墟弟子  
來受業者滋衆所養益宏邃戊戌登進士己亥授兵部  
武選司主事壬寅陞職方員外郎乙巳陞武選郎中丁

未調職方是時虜勢甚張無歲不內訐北邊騷動職方之任稱難公在兵曹以才畧著聞及調職方毅然圖所以揚國威折虜驕者會曾襄愍謀逐河套中虜復三城故蹟公自中從史之俄以飛証解職未幾襄愍亦被竒禍事竟寢至今有惜之者己酉復武庫郎中庚戌陞陝西按察司副使是秋虜大舉寇京東焚戮甚慘遊騎薄于都闐天子震怒詔悉汰文武吏之不任者簡材臣任之乃改公山東按察司副使整飭密雲兵備次年以擒姦功轉叅政癸丑陞都察院右僉都御史駐守昌平昌平之有駐守自庚戌始及是議省之乃移公巡撫延綏

延鎮密邇套虜時苦侵暴屬連歲荐飢軍餉歷三時不  
給諸戎備率頽弛公至則汲汲次第理之為之請餉為  
之條上方畧軍容改觀在鎮且三年虜每入寇必遭挫  
衄去督臣覈上其代錫金幣凡再云丙辰丁繼母高憂  
歸是時虜勢益披猖廟議需邊材甚急而公望益重會  
虜圍大同右衛不解命廷臣各舉所知戡亂才其以公  
名應召者無慮二三十疏適公服闋而薊邊告急乃復  
召公巡撫順天公聞命疾趨未及境則虜業自潘家口  
入矣虜退諸地方官志得罪公亦蒙謫命專致仕十年  
餘迨隆慶丁卯虜東西部同時內訌西自偏關入破石



州東則蹂躪平都邑震動是時穆宗新即位以為憂詔求夙昔封疆之臣足任使者臺臣悉以公薦戊辰乃起家以原官巡撫甘肅地方甘肅孤懸河外三面羗虜邊備積弱虜部帳駐莊浪山丹間道路阻絕公入境號令一新虜聞即徙去比暮年則烽堠明城堡固芻餉足士氣振或不時虜以數十騎窺塞垣輒遭擒馘河外以寧莊浪土軍驍悍為虜所憚魯氏者世統之號曰魯家軍頗驕縱當事者矜裁抑之會其宗派中絕遂不振公召其宗人應繼者優撫之激以忠義其人感奮自效復能成軍公知其可用乃疏請復其世職莊浪至今賴之已

已虜東西部相結西侵瓦剌乘勢以其衆壓井凉入掠  
公嚴督將士晝夜職守時出奇兵撓之斬首數十級虜  
飲去在鎮以功捷蒙錫賚至于再三復相度阨塞增設  
險固浚壕塹治崖洞千里相望屹然成河西巨障焉時  
庚午方以六載奏績媚者毀之有詔免公歸歸則簡出  
養重翫志墳典尤深于易數休咎必先知間以語人多  
奇中者闢塾課于擇賓友與之居雖甚寒暑不少休廢  
蓋盤桓東山者十餘年諸子方烝烝向進未已而公遽  
告終實萬曆辛巳二月二十四日也距生之日享年七  
十有五始聘楊氏先嫁而卒娶何氏封安人進封宜人

恭人淑德令儀克配君子事祖姑及繼姑能無愆于婦道撫子女能訓馭婢僕能慈嚴族黨能不以貴自矜生于正德丁丑二月初九日卒于公卒之年三月十五日享年六十有五子男四汝闓早卒汝闓州學生娶楊氏繼娶辛氏何恭人出汝闓州學生娶杜氏汝闓早卒側室宋氏出女五一適國子生景賓一適官生楊俊彥一適潼關衛指揮同知黎從政何出一繼室景賓一字庠生沈應宗出孫男二道保經保女四俱幼卜葬得辛巳十二月十二日卜兆得峨嵋原新塋汝闓乃衰經扶杖走都下䟽列公前後功次乞恩卹之典詔所司覈實賜

論祭如例已而介公友陝西叅政張公廷栢所為公狀  
謂余卽涕泣以銘請按狀所言公事業在國表儀在鄉  
余皆習知之廼其緒教在耳者更殷然未忘也用是不  
辭為銘銘曰溟渤浩渺艤鐘可航盤錯所會亦賴干將  
龕變夷紛匪才曷克用適其時乃罔不得公負利器出  
邁多虞帷幄秘畧藩扞雄圖世既見知試亦既效千里  
方馳竟沮中道逍遙一壑與造物游歛厥未究貽祉箕  
裘膺膺崇阡蒲阪之首我銘玄堂陳信不朽

封中大夫南京光祿寺卿碧泉劉公墓誌銘

封中大夫南京光祿寺卿碧泉劉公者大理卿小魯君

一儒之父也初大理君自留都奏續詣闕便道省覲因  
圖丐侍養于家公稱引大義督使就道已復時時貽書  
慰解之居未幾聞公計大理君摧毀不自任乃忍泣陳  
情上為錫卹典如制于是大理君以少司馬魯確庵氏  
所為公狀質余為銘按狀公諱大賓字以敬湖廣夷陵  
州人自其先世皆隱德弗仕公始習舉子業為宜都邑  
諸生宜都者夷陵旁近邑也邑令素方嚴于諸生鮮所  
假借然獨雅重公折簡延為上客曰此劉孝廉安得樂  
以傳人遇之蓋公自為諸生時輒以行誼著事三親色  
養備篤執喪哀毀如禮久之猶戚焉孺慕也其守身遂

巡若處子擇地而蹈非其義不以一介自縊以故州里  
中目之曰劉孝廉乃邑令亦因而稱之云公績學攻苦  
所為文常屈其群輩每督學使者至試必優公乃屢躋  
場屋人咸為公惜之大理君自幼穎拔為郡守所器異  
將薦諸督率使者公固遜曰孺子未學其高致如此大  
理君己未舉進士歷官吏曹郎滿三載考得封公如其  
官迨晉考功大夫值歲大計得臧否天下吏公貽書成  
之曰慎哉是黜陟幽明之際也兇念之矣客踵門通謁  
者驟謝弗敢見有故知自千里外走幣脯相問訊公固  
辭弗入或謂公受之何嫌公咲曰吾非謂束脯已也大

理君自從宦于朝嘗一迎公就養又一病免家居皆獲  
從容侍膝下比兩官留都距夷陵稍近公棲遲家食不  
復就也居門無他嗜好惟喜攻字學問為近體詩取適  
興與人文務在長厚耻言人過失或兩爭互質或燕會  
譚譚徐出數語剖析之能使競者息辯者服故劉封君  
之名燁然聞楚中楚中人所為慕劉封君者非第以其  
子也生平故無疾病動止整肅終其身不見媿容卒之  
前一日猶晨起對客午泛觴飲乃罷翌日遂端坐而逝  
先是術者謂公當享遐壽又當脩然冲舉若神仙將其  
言果中耶公素性恬淡家居健戶距躍有司高其行屢

致公飲于鄉皆力辭不赴獨至赴人緩急則直前無所  
憚村有被誣為盜者七人極大辟公發憤嘆曰冤哉此  
七農夫也遂挺身往白竟釋之七人者乃竟不知為公  
德也其陰德卓行蓋直與傳記所稱隱君子者伍劉氏  
之門宜益光大矣公生正德己巳正月初二日卒萬  
曆丙子五月初六日享年六十有八曾祖敏祖永深交  
漢贈官如公所封娶程氏繼娶秦氏贈封皆淑人子男  
一即大理鄉一儒女二適宗堯陳廷節俱庠生孫男三  
長戡之以廕為國子生聘少師太學士江陵張公女次  
袞之聘吉安守雷君女大理君卜兆在東山祖壠之原



塋以某年某月某日銘曰培厥本華斯蔚匪厥淵流斯  
沛物理固然神理罔沫懿惟公德則會歛厥施後斯泰  
民有儀邦是賴楚南有封恩卹汪濊歸璞衍祥千禩未  
艾

通奉大夫四川布政使司左布政使水陽亢公墓誌銘  
萬曆庚辰五月十六日水陽亢先生卒于家厥嗣孟禧  
輩走使京師屬王翰檢祖嫡為狀而介以請余銘曰先  
生治命也余先生同郡人自始升朝獲從先生後游詞  
林淑誨景德既深且久銘為可辭按狀先生姓亢氏諱  
恩謙字子益水陽其別號也世為臨汾人出春秋宋大

夫亢軫之裔石晉時姓已著郡中入明有曰復成者為先生高祖復成生通通生昇錄貢入太學授兗州府知事生逢爵則先生父也以先生貴贈翰林院編修元配賀贈孺人繼鄭封太孺人初贈公賈齟于閩而賀卒乃娶鄭鄭閩望宗也鄭嘗夢雲中旌幢擁偉丈夫自東而西者正德乙亥十月十五日生先生先生而願異六歲受書一過即成誦甫十歲贈公歿旅櫬娶孤滯閩者且十年先生感奮力學游閩名士聞閩名士讓弗及也癸巳自閩歸適郡邑試諸生先生名第一父老大驚已而督學使者及御史試又第一甲午以儒士登晉鄉書

第一丁未賜進士二甲第一人簡為翰林庶吉士屢試  
輒冠其曹己酉授編修辛亥使淮藩一切餽遺謝弗納  
壬子命教中貴人書先生嘆曰此輩不患無材藝患不  
知大義耳每取漢唐以來宦官事可為勸戒事者反覆  
訓諭之中人感動癸丑分校禮闈所錄多知名士丙辰  
擢河南提學副使兩河地廣校閱常二歲不能周先生  
一歲徧諸僻邑善品藻士今少宗伯何啓圖與王翰檢  
皆先生昔所器重國士遇之者也戊午擢河南右叅政  
分守洛陽是時伊庶人驕僭大營府第煥緣得請八萬  
金助工下通郡履畝加徵趣辦先生感然曰歲屢凶民

困極矣正供不足而橫加額外征此不死徙則盜耳乃  
密言兩臺王驕甚宜早裁之且其室已逾制弗可加不  
宜重病民無已且生他虞兩臺以聞事遂寢未幾庶人  
竟以罪廢僱師有孫家灣者其地饒梨棗業已輸什一  
稅有希當道意議增什三者衆莫敢難先生獨曰是竭  
澤而漁也竟已之分守建署會城而洛下猶歲供數百  
金徃徃乾沒先生悉登藉無何伊事起大吏踵至賴是  
不加賦而用饒庾申蝗四方流民競趨河洛茅相屬於  
道先生設法賑濟全活甚衆辛酉擢陝西按察使監秋  
試秦中謂是榜得人耀州民某雄于貲與甲構甲不勝

憤仰藥死某覘乙與甲卻昧入而乙抵其事爰書既上  
先生為白乙寃而以某抵法是冬入覲以身率下郡邑  
吏無受餽者渭南令新仕未習吏被訾且罷矣先生惜  
其才當太宰庶吏治日具訖所以然者令不知狀卒全  
令壬戌擢山東右布政使宗人祿廩糾紛每藩司出納  
輒號呶盈庭先生至則井井辦集公庭寂然有盜書攫  
大璫金大璫怒捕者欲誣富室取盈東人大恐藩臬方  
會鞠先生一出詰而真盜伏餘無所問癸亥擢四川左  
布政使蜀地旱濕多陰雨郡邑運米累鉅萬露集率數  
月不收米敗則責運者償家輒破先生躬臨庾下至輒

收之諸僚乃更番往于是露米盡藏公私稱便居無何  
會有詔以災異察外寮中臺有不悅先生者嗾言官以  
飛語中之先生遂歸時甲子三月也先生既返初服日  
以奉親課子為樂杜門謝客足跡不校公府丙寅居鄭  
太孺人喪哀毀甚宅左建二祠前祀其師曰報知後祀  
所生曰致享一蔬一果必先獻別治小圃列圖史時時  
吟嘯其中暇則與耆舊陳說詩書敦行鄉約罷癘殘疾  
待先生哺者遺孤待先生育者窶空待先生舉火者不  
獨其族乃爾善飲有酒德不喜聲伎優游林臯十七年  
壽凡六十六而卒卒之日里黨悲悼相與巷哭罷重其

德感深也先生雅負軟才顧性溫恭淳厚方其取高第  
昇華階貌冲然若虛其中常有以下人者人以為先生  
恂恂退讓君子也迨出而臨政車轂所至則注措犁然  
可觀其仁恕殆天性好掩人過治獄務求其生迄今閩  
洛魯蜀間談先生事不啻欲戶而祝之子孫多賢天道  
良不爽爾所著館中稿及詩文若干卷藏於家娶盧氏  
贈孺人繼田氏封孺人子男六孟禎庠生娶王氏廬出  
孟禧舉人娶宋氏孟祺庠生娶郝氏孟禔庠生娶張氏  
繼任氏田出孟禴庠生娶楊氏孟禔聘李氏側室兩劉  
氏出女五一適庠生李喬蕃田出一適庠生陳經科一

幼劉出一許于桂綺一許侯于齊劉出孫男四以恒庠  
生孟禎出以慎以忱以情孟祺出孫女七一許荀兆龍  
孟禧出一許周繼茂一許狄仲仁一許張文相一許阮  
向上一幼孟祺出一許張懋誠孟禎出孟禧等以是年  
八月二十四日塋先生于九州堡之新阡蓋先生所自  
為卜吉云銘曰雲幢環衛自天降神生賢于晉發兆于  
閩一鳴驚衆若鳳斯翔巍科卓起大對洋洋東觀納書  
北扉綰綬良吏龍門才相先後一麾治外五踐臬藩輶  
車攸歷棠蔭孔繁政成而歸堯山之麓面室圖書潯陽  
松菊耆壽令終函蒙嘉祉錫美輔昌振振麟趾佳城永



閔鏡石埋詞流光不朽萬年考斯

湖廣叅政中峯楊公墓誌銘

公諱相字允立別號中峯姓楊氏幼莊重不好弄壹意問學未弱冠補郡庠弟子負聲稱藉甚以嘉靖甲子舉于鄉明年成進士授咸安知縣縣古趙地其民崛強喜爭公至則申嚴保甲修明鄉約法紀振肅無所容奸邑有盜首歲聚從行劫自山東河南北久被其毒前政莫敢詰至是公擒而戮之民賴以寧有西鎮卒戍東方者還過邯鄲其帥道死因群作不靖百姓詢懼監司檄郡邑合兵擊之公曰此曹非素亂以無主故拒懷至此請

馳使論以禍福當自戢不宜急以生變從之果宵遯隆  
慶丁卯以三載考績勅拜文林郎戊辰擢山東道試御  
史巡視十庫尋實授本道監察御史巡按陝西茶馬勅  
法貞度剗剔弊蠹商民便安馬大蕃息辛未巡按河西  
河南當南北之衝無名山大川之限民疲于送迎而盜  
賊易以出沒公下車治不激不弛善良者舉欣欣得所  
休息而猾巧輩率奔竄屏息莫敢逞者然且隆學校慎  
疑獄愷然盡其心力士民大和萬曆癸酉巡視京營未  
幾擢山東按察司副使整飭海右道兵備海右故多鹽  
礦四方無賴時時群集作姦利或嘯聚島嶼中為居民

惠公悉心撫馭威信孚洽海濱以無警丁丑擢湖廣布政司叅政分守上荆南道偶病溫疾冒暑涉于楚地至則庫濕恒雨寢不能堪戊寅致政歸凡宦于楚者相與挽留弗能得下逮岷庶靡不惋惜者歸而疾遂劇越三歲弗愈竟卒于家公孝廉誠敬出自天性父松岡公歿公以諸生理葬事動協諸禮每歲值忌日必奠哭如初喪乃至二十年無改人以為難軍衛每審編徭役諸武吏率條具為文冊有司藉以終事公在成安承檄勘德州衛武吏進籍公格不用乃悉召什伍躬閱之登載公明毫無私假一軍驩然凡御史按部事竣例徵罰鍰之

羨以充私費公歸自陝乃秋毫不染蒲人有久客秦隴者至今記語里閭以為異也心地洞豁遇事剛果有風裁嘗考成憲酌時宜疏言茶馬四事理財三事滾滾千餘言皆闕大體行部河南有一二不職者介恃輿援肆無忌憚公特疏汰斥之吏習一變至論成國不當追王膠河不當勤衆侃侃持正尤為時論所多馭下嚴而有恩吏胥自公事外無敢啓口者至斗粟尺布可以假之民有弗用也以故宦轍所暨罔不畏而愛之性不喜机巧與人一以實心從仕不獵聲華一以實政食無擇豐衣無擇麗終其身無媵侍可謂淳篤君子矣公先世家

長安元末有名義鄉者始徙蒲占籍故市里義鄉生旭  
祖旭祖生伯貞伯貞生文秀文秀生藻藻生銘銘生鶴  
是為松岡公公父也粵有潛德用昌其後以公貴贈文  
林郎成安知縣加贈山東道監察御史娶于許再封太  
孺人嘉靖庚寅五月十四日寔生公公卒之日為萬曆  
辛巳六月十九日享年五十有二妻任氏再封孺人子  
男二長燮州學生娶范氏次煊萬曆丙子科舉人初聘  
余女及笄而卒娶韓氏王氏女二長適王汝閭次字張  
元徵余季子也孫男二遠芳遠茂女一幼燮等將以壬  
午九月二十七日葬公于譚家庄祖塋之次乃衍戚撰

狀拜授使者以祈余銘于京師余辱從姻姪知公最悉  
且感二子者之祈辭哀也乃按狀而銘之銘曰有嘉淳  
德得全自天少壯不渝紹蒞握筌作宰封圻政成卧護  
乃陟中臺丕揚憲度予以審宣東齊南楚威愛交翔震  
霆甘雨吏民載道愴矣攀轅嗚呼曷歸惟德弗諼貞石  
有銘永徵芳躅神藏孔安穀爾似續

陝西行太僕寺卿少源張公墓誌銘

吾友少源張公者蓋古之所謂狷介人也矜尚氣節磊  
落好自信自世之訖言衰行雖判乎與已無與而頽然  
变色若將挽之即得之傳聞亦掩耳不願聽異日遇其

人望望去之不忍視其面焉及聞人有片善寸長即擊節嘆賞當其心所欽服雖在千里每恨不泝下風拜之其善善惡惡若是乎分明而不以毫髮借也故以此見重于人而亦以此齟齬于世公初由館選授臺察肅紀宣風毅然澄清自任南理淮隄北籍禁旅咸有貞亮績聞者憚之于時柄臣任不才子擅權黷貨數法凡諸要津華秩悉以巨賄進公顰蹙曰朝廷設銓衡耳目之官所以綱紀臣上糾正邪枉者豈擁門索價異耶即若此國將奚賴迺上疏頌言攻之柄臣滋不悅遂出公守河間歲餘柄臣以贓敗諸附屬要結悉從顛仆而凡守正

淹擯士駸駸敘進公迺陞副湖憲公論且籍籍謂公以  
直言出宜召補某近會有纖人典銓司驕恣張權以意  
為軒輊乃以公為陝西行太僕卿嗚呼直道之難行豈  
時昏瞶時哉世濁矣方正之不容宜也時方改轍振枉  
興滯迺一夫作使而公竟淹抑以死悲哉予初同公舉  
進士司肄業中秘每欽公侃正嘗竊以立儒為予年少  
長于公公兄事予甚謹夙昔與公期嚮者何似而公遽  
至是耶余初聞公訃而悲念嗣子方穉擬作誌寄之壙  
中未果迺公仲父南泰公者耄矣冒盛暑手令民部襄  
垣劉公所為公行狀走千里求予銘嗚呼予之銘公豈



侯請耶廼南泰公以猶子之故用愛若此可不謂高誼哉按狀公諱九功字惟叙別號少源沁州在城里人世以儒為業高祖溥陝西會寧尹曾祖顥國子生祖好古貢入太學贈監察御史父鵬大理寺寺丞以公貴進階奉政大夫母周氏初封孺人後以公貴進封太宜人公幼警敏壬子舉于鄉明年癸丑登進士改翰林院庶吉士授河南道監察御史巡視蘆溝橋工完有銀幣之賜巡視兩淮鹽法疏通積滯屬倭寇颶發創建揚州閘城及各鹽場城民賴無恐諸興廢甚衆具載江北奏議中代還復巡視京營陞河間府知府行常平作保甲建義

田興學校瀛人至今思之陞湖廣按察司副使視旅柳  
桂有叛獠不靖公勦之陞陝西行太僕寺卿未履任卒  
生嘉靖戊子七月十八日卒嘉靖乙丑十月八日得年  
三十有八配劉氏封孺人先公一年卒予嘗為誌于男  
一人慶徵側室某氏出聘劉氏葬地為城西北五龍川  
新阡塋期為隆慶戊辰某月某日銘曰亨否有時直枉  
分之氣遷物化曰惟其宜迺有通人幻捷若神緣時觀  
變無往不伸咨惟堅士信心一志當晦固艱方明復躋  
作善靡祿天道謂何宇宙無窮耿氣不磨伏牛巉巖漳  
流瀾瀾哲人藏焉錫爾世祉

山西按察司副使丹崖胡公墓誌銘

公諱湘字濟之姓胡氏其先蜀之營川人也六世祖諱仲遠者仕為河南內鄉丞子孫遂家焉故今為內鄉人高祖暹曾祖驥祖忠封禮科給事中父瑞歷官都御史母封淑人李氏安慶府同知李公女也于成化丙午九月廿二日生公公生而後櫛弱冠舉于鄉嘉靖癸未登進士第授大理寺評事轉寺副寺正陞山東青州府知府以母老疏請歸養既卒喪復守寧國府陞山西按察司副使遂謝政歸歸十餘年而歿蓋嘉靖庚申十二月十六日也得年凡七十有五云公天性樂易雖質任簡

伉不解為世俗態而用情懇到人與之居久無不得其  
歡與人語雖僮僕恂恂若恐傷之居鄉黨未嘗有競于  
物里人嘗有犯公者公不之較已而其人內媿公長者  
益復親公尤嘉與後進里少年稍知向學即引與抗禮  
今翰林院檢討李君蓀者公外弟杏山李公子也異李  
君即以子妻之其所以誘道之者甚至未幾李君果顯  
人謂公知人其居官所至以寬見稱為廷評時嘗錄囚  
陝右所平反無慮數十輩時公未嗣既而生男子四人  
殆陰德報也性善酒好客能連日夕飲不醉既歸田每  
與客傳觴對奕命青衣雅歌以追逐風日之勝陶陶如

也酒酣輒操筆為詩以寫其自得之趣已乃輒棄去其  
真率如此治端陽別業以佚老其中素故少病歲時督  
佃僕課藝獲行年七十餘策馬揖拜不異少壯人其術  
于天者全也公初配史氏孺人崔氏孺人劉氏故大學  
士洛陽劉文清公之孫女皆先公卒無出今配張氏生  
男子一人廷俊生負女二人長適生負閻蘭次適翰林  
院檢討李裴餘側室子男三人廷乂廷密俱生負廷阜  
幼女四人一適生員李成林一適李文奎一字知縣陳  
誥男某一字簡學男某孫男一孫女二廷俊等將以卒  
之明年某月某日附塋公于縣城北大峪里祖塋之次

公婿翰林檢君奉若翁告山公命狀公行屬余誌而銘之  
銘曰嶠家源江濬派載東百川攸欲彌遠益豐惟公之  
先自渝徂遷代行既昌黻綬相聯以肄于公有赫繩武  
朗度冰瑩冲襟春煦既典國平颺于中外民則有思文  
惟不害廼戢景熙歸賁千園松菊常存桃李不言率是  
壽考亦既燕喜延祚自先施于孫子鬱鬱北原有崇者  
旣我銘不爽對于萬年

贈中憲大夫山東按察司副使滄溟高公墓誌銘  
蜀有隱君子曰滄溟高公者行誼甚偉教子以義方稱  
今山東布政司叅政文薦公長子也當歲辛未余叨貳

銓宰天子方大計群吏之治詔所司核其政績尤卓異者以名聞禮饗之旌以篚幣以風天下于時叅政守湖南之長沙聲實四方最遂以應詔詔下郡國修覲事在闕庭者數千人莫不翕然誦讀之自以為弗及也余固心竒叅政治行矣已而見其人恂恂甚都與之言復倣儻多大畧余竒之滋甚乃蜀樞紳先生因稍稍談滄溟公潛德則又益知叅政之賢其有自也初叅政方舉于鄉而滄溟公歿塋華陽李村之新阡比叅政取甲第歷撫仕凡三值國恩加贈公為中憲大夫山東按察司副使叅政既與余識乃持公內弟前應天府尹周公倣所

為公狀徵余為銘蓋公歿至是凡十有八年矣其孝思  
不苟遠而有待如此按狀公諱鵬字雲程姓高氏滄溪  
其別號也高氏故為陝西鳳翔人四世祖諱成者始徙  
于蜀籍成都右衛迄今子孫家焉高祖敬祖曾祖貴祖  
政父仕勉母甘氏公天性樸茂伉直自信慷慨有大志  
幼補邑庠弟子負篤學績文寒暑不懈期以表見于時  
自待甚厚會父遭疾經年公晝夜侍湯藥目不暇者數  
旬乃至蟣虱叢生衣衾間不顧也父疾且革曰兒至孝  
爾後必昌公悲慟終三年見者戚焉是時繼祖母盧母  
耳在堂環堵蕭然餅無儲粟公色養承歡心力竭瘁無



復進取念矣成都西南大都會多富人俗尚奢忤端黨  
間率乘堅策肥啖醲醢曳麗靡以相夸詡公終歲屢空  
徜徉自得視之蔑如也有勸之從族閭殖生產者則曰  
吾道不在是每喟然自歎不獲卒業于學見諸子生有  
異質乃一意訓督之肄習有所朝夕有程跼足吐聲跡  
之矩矱嘗取古人立身顯親志節彪炳者時時稱說以  
激發其意故叅政入官從政隨所至必馳令聞由得于  
庭訓者豫也公豪達任氣不戚戚于生計居暇必置酒  
醴召里中父老與之歡譔笑傲博塞投壺酣歌竟日闕  
畧眇小禮文蕩佚世事鄰里富侈人或訾斥之不為易

也性故夷坦無畛畷人無貴賤疎密接之若一日用固  
寔然見人阨困惻若在己必毅然思以拯之仲父為諸  
生卒無後公為理塋事盡誠敬且經紀其家口俾無失  
所姊適楊氏者夫婦偕歿遺孤方一歲公取而撫育之  
教訓婚配使之成立其居貧敦義尤人情所難云公生  
于弘治壬戌正月八日卒于嘉靖丙辰七月二十四日  
得年五十有五配太恭人周氏封戶部主事潛庵公之  
女溫惠慈儉婦道母儀兩俱可述子三伯即叅政文薦  
己未進士娶何氏封恭人仲文舉邑庠生娶楊氏前宰  
相新都楊文忠公曾孫女二子俱周出季文選側室王

出女一適恩貢生徐元吉孫男五以道以明餘幼孫女  
五長許聘右副都御史方湖王公孫鼎指揮應襲次許  
聘張修吉千戶應襲餘幼銘曰益部之高遷自岐下七  
世而昌公篤其祐矯矯其風巖巖其宇物表璆琳人倫  
儀羽世莫我偕得天則多川匯斯沛蘭茁其華弘毗于  
國悠慶自家華陽有所松栢既拱衍祚在茲鸞章貴隴  
納銘羨道昭德惟永